



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

3. Kalenderwoche – ab 18 Januar 2009

Desdberischd

Da hamm dor Böddschor un dor Fischor, die zwee Schbaßveeschl vom Radjo RSA, die zwee Bossnreißor - die hamm eene säggsische Dasdadur erfundn. Fiehrn Gombjudor! Wo mor so droff schreim dud. Ja. Un off dähr Dasdadur dud alles in Säggisch droffschdehn. Also, off die Dasdn. Off dor "ESC"-Dasde schdehd zum Beischbiel "Abhaun" droff. Off dor Dabelladorasde schdehd "hubben". Bei die einzelnen Buchschdahm dud immor e Beischbiel dabeischdehn - bei "A" schdehn "Abbl", bei "L" schdehd "Läborwurschd" un bei "M" dud beischbielsweise "Muschebubu" schdehn. De Wegmachdasde heeßd "Radschorr".

Isch hab so eene Dasdadur von dor Firma Finsdorbusch geschengd gekrischd. Isch soll ma iborbriefn, ob die Dasdadur werglich gehn dud.

De Firma Finsdorbusch dud Saunas baun. Ja, Saunas! Odor dud das "Saunen" heeßn? Wobei - de Mährzahl von Sau is ja Säue. Da kennde das nadiehrlich ooch sein, de Mährzahl heeßd "Säunen"? Eene Sauna, viele Säunen!

Nee, das klingd bleede. Es dud beschdimmd Saunas heeßn. Rein so vom Glang hähr!

Also jednfalls, währ wo eene Sauna hamm will, dähr muss sich an de Firma Finsdorbusch wendn. Die komm bis nach Esdreisch odor in de Schweiz. Abor ooch nach Oddndorf odor Limbach. Das Geschäfd leefd! De Leide wolln schwidzn! Schwidzn is in!

Isch bersehnlich bin nisch so e ganz großer Saunafreind. Wenn isch in dor Sauna gewähsn bin, da komm isch immor raus wie e offgebriehdes Schbanfärkl. Isch gliehe in rosa! Isch brauch hinnorhähr

mindensdens zwee Schdundn un drei Bierschn, bis isch widdor eene gesunde Hautfarbe hab. Nee, isch bin fiehr Sauna irschendwie zu zard! Abor währs guhd vordrachn dud, das Schwidzn, dähr dud sisch ehm in sei Heisl odor in seine Gardnlaube eene Sauna einbaun lassn. Von dor Firma Finsdorbusch. Mid alle Schigahnen! Die hamm ja ooch eene Hohmbeedsch im Indornedz. Un off dähr Hohmbeedsch da is ooch jede Woche das droff, was isch in Säggsisch fiehr dähn "blidzbungd" schreim due. So aus Schbaß fiehr de Leide, die Saunas koofn wolln, dud dor Herr Finsdorbusch das da neinschdelln. Dor Umsatz soll sisch seidhähr mindensdens vordobbd hamm! Un so is das also gekomm, dass mir dor Herr Finsdorbusch die Dasdadur iborreischd had. Zum Desdn. Un ooch als Arbeitserleischdorong, wenn isch in Säggsisch schreim du. Un in soweid is das ooch alles vellisch rischdisch. Bloß nu kommd dor Desd an sisch. Un zu meim Leidwähns muss isch geschdehn, dass mir die Dasdadur nisch viel nidzn dud. Das is wie bei dähr rischdischn Dasdadur - du mussd von selbor wissn, wie de was schreim willsd. Un wensde ehm mid dähr säggsischn Dasdadur das Word "Gaffee" mid "K" schreim dusd, dann kommd ooch mid dor säggsischn Dasdadur "K" un nisch "G". Am besdn gefalln mir off dor säggsischn Dasdadur die Dasdn, die dann "nuff" odor "rundor" heeßn. Odor "nübor" un "rübor". Odor "Ferdsch!"

Da weeßde ehm soford, was die jeweilische Dasde machn dun kann. ""Nei!" odor "Naus", "oum" odor "undn"... un bei Gomma dud ehm "Gomma" schdehn. Das is sähr hilfreich, wensde weeßd, wos hingheern dud!

Eduard Sachsenmeyer